



Gabinete Wever - Croes II

ISLA ((•)) NLINE

Diamars 29 Maart 2022

Email: IslaOnline@gobierno.aw Tel: 528-4952

NOTICIA DI GOBIERNO



20
22

AÑA DI
**INVERSION Y
OPORTUNIDAD**



PROME MINISTER TA EXPRESA PALABRANAN DI CONSUELO Y FORSA NA FAMIA DI BABY NOAH Y HOBENCITA CASSIDY



Aruba a cera un siman cu dos acontecimiento hopi tristo cu a sacudi curason di tur. Prome Minister Evelyn Wever-Croes, den conferencia di prensa di Gobierno di Aruba dialuna mainta a expresa su palabranan di consuelo y forsa na ambos famia cu e perde nan yiu den un forma asina inespera.

Forsa na mayornan di Baby Noah:

Prome Minister den nomber di Gobierno di Aruba y pueblo di Aruba en general, ta desea mayornan y famia complete di baby Noah di apenas 4 luna, cu diahuebs a fayece na un scol creche, hopi forsa. Por a nota cu Aruba henter a biba e tristesa grandi aki hunto cu famia di baby Noah. E compromiso di Gobierno ta keda pa creche y luganan cu ta cuida nos muchanan ta luganan mas safe posibel pa nos muchanan. “Pero tin biaha, Dios ta dicidi diferente”, Prome Minister a expresa.

Accidente tragico di Cassidy:

E accidente tragico di boto unda cu un hobencita turista di 13 aña a perde su bida, tambe a conmovi comunidad bastante y tambe a trece hopi tristesa. Ministerio Publico y Polis Maritimo ta atendiendo cu investigacion profundo di e accidente aki y lo duna mas informacion despues cu esakinan bira disponibel. Prome Minister a duna di conoce cu despues cu e investigacion finalisa, lo reuni cu tur autoridad cu ta atende cu e tema di watersports pa delibera si e investigacion ta sugeri cu mester bin cambionan teniendo cuenta di e seriedad di e siguridad di local y turistanan.

Apelacion pa ta mas cauteloso:

Prome Minister ta haci apelacion riba tur cu ta haci e tipo di trabounan aki, pa ta extra cauteloso. Despues di e accidente tragico aki, e no por ta ‘business as usual mas’. “Esaki ta un muestra di e responsabilidad cu cada ciudadano ta carga pa nos hiba nos pais padilanti. Como gobernantenan, nos tin un responsabilidad grandi, pero cada ciudadano cu ta labora riba nos pais, esnan cu ta traha na beach, den hotel, den gobierno, scol y cualkier otro caminda, tin cu carga nos responsabilidad y sea extra cauteloso. Ban duna e miho calidad di servicio. Y ora cu ta trata bida di hende, laga nos pone mas atencion ainda na esaki”, Prome Minister a enfatisa.

Prome Minister ta bishita mayornan di Cassidy:

Prome cu nan a biaha bek pa nan pais, Prome Minister a bishita e mayornan di e hobencita Cassidy, kendenan ta hopi kibra y desconsola cu e perdida grandi aki di nan yiu. Sinembargo, nan ta hopi agradeci di e sosten cu nan a ricibi di varios persona na Aruba.

“Ban sigui tene mayornan di baby Noah como mayornan di Cassidy den oracion y den pensamiento y cu Dios duna nan forsa cu e perdida grandi aki.

Prome Minister Evelyn Wever-Croes: CAMBIO DI CONTENIDO Y TITULO DI COMUNICADONAN MANDA PA PRENSA TA FALTA DI ETICA Y PROFESIONALISMO Alabes e ta cambia e esencia di e comunicadonan

Durante Conferencia di Prensa dialuna mainta, despues cu Prome Minister Evelyn Wever-Croes a duna un splicacion amplio riba e procedura di suspension di un empleado publico, a splica con cierto prensa ta cambia contenido y titulo di comunicadonan manda.

Den fin di siman, despues di a tuma nota di e manera con oposicion a hiba e situacion di e empleado publico cu a wordo suspendi, Gobierno di Aruba a presenta un relato di prensa exactamente riba e parti cu Prome Minister a splica detayadamente di con e procedura ta na momento cu un empleado publico haye den situacionnan asina.

"Gobierno a saca un relato di prensa na unda nos ta bisa cu integridad no ta depende di genero. Integridad ta haci lo corecto. Lamentablemente nos a ripara cu un medio di comunicacion a cambia e titulo y e esencia y pa colmo a pone un mentira cu ta para cu e Griffier lo a pidi ami pa firma e carta. Pa colmo nos ta mira despues tambe cu Parlamentarionan ta reacciona riba e mentira aki pa purba hacie un berdad y cuminsa cuestiona ami riba dje", Prome Minister a remarca.

Prome Minister a pidi e medio di comunicacion pa coregi esaki y nan a nenga di coregi. E titulo y articulo cu Gobierno a manda pa splica e procedura kico ta pasa ora cu bo tin un caso di integridad. E medio di comunicacion a haci cambio na e titulo cambiando e esencia di e berdad.

E titulo cu Gobierno a manda:

'INTEGRIDAD NO CONOCE DISTINCION DI GENERO'. "Ora bo ta para pa integridad, bo mester actua, maske ta hendenan di bo propio partido".

E titulo cambia di e medio di comunicacion:

MIN PRES; TA GRIFFIER DI PARLAMENTO A PIDI MI PA SUSPENDE LIESJE.

"Ningun caminda den e articulo ta poni cu un hende a pidi mi. Ningun hende mester pidi mi pa mi asumi mi responsabilidad. Esey tabata e esencia di e articulo. Ami ta akinan no pa ta popular sino pa mi carga mi responsabilidad", Prome Minister a enfatisa.

E medio di comunicacion aki, despues cu Prome Minister a pidi nan pa cambia e titulo aki, nan a nenga y a contesta cu si Gobierno no paga, nan ta haci cu e articulo loke cu nan kier.

"Gobierno no ta paga pa ningun articulo pues el a keda asina. Mi ta keda di opinion si cu esaki ta contra etica y profesionalismo, pero e ta keda na e medio di comunicacion. Ami no ta akinan pa ataca, mi ta akinan pa musta riba un hecho cu a sosode y mi ta kere ta importante pa henter Aruba sa pasobra e ta mi responsabilidad cu comunidad", Prome Minister a duna di conoce.




Gabinete Wever-Croes

5h · 🌐

Prome Minister Evelyn Wever-Croes:

**INTEGRIDAD NO CONOCE
DISTINCION DI GENERO**

"Ora bo ta para pa integridad, bo mester actua, maske ta hendenan di bo propio partido"



24ORA.com



Home · Política

POLITICA

**MIN-PRES: TA
GRIFFIER DI
PARLAMENTO A
PIDI MI PA
SUSPENDE LIESJE**

26 March, 2022, 3:21 pm



Durante su biahe na Hulanda:

MINISTER XIOMARA MADURO A REUNI RIBA E TRABAONAN CU MESTER WORDO HACI PA MEHORACION FINANCIERO DI PAIS ARUBA

Riba su agenda di biahe di trabao na Hulanda, Minister Maduro a reuni tambe riba e tereno financiero. Manera nos tur sa Aruba tambe ta bezig pa locual ta trata e leynan di conseho di reino y den nan tin e RAFT, esaki ta pa e supervision financiero cu mester bira un ley di consensus di reino. E trabaonan ta wordo haci pero den e preparacion pa esaki su implementacion, Minister di Finansa a tene varios reunion na Hulanda.

Reunion cu Sr. Richard van Zwol, miembro di Conseho di Estado

Minister di Finansa a trece dilanti cu a reuni cu Sr. van Zwol, kende ta Staatsraad na Raad van State y alabes e ta miembro di e camara presupuestario hulandes (begrotingskamer). Ta trata un reunion importante buscando e solucionnan, pasobra e supervision financiero cu ta bini y sigur cualkier otro mehoracion financiero pa pais Aruba, lo tin cu conta na un momento tambe cu un begrotingskamer. Durante e reunion a intercambia pensamiento cu Sr. van Zwol, kende conoce Aruba y door di su conocimiento di e otro begrotingskamernan den Europa (e ta presidi diferente begrotingskamer na nivel europeo). Pa Sr. van Zwol su experticio a hiba un combersacion riba e grandura di un camara asina pa Aruba y unda e camara aki mester wordo ubica den locual ta e constelacion cu nos conoce aki na Aruba. E trabao di e camara aki ta bay ta pa supervisa e normanan financiero y esaki ta bay tin mester di dje pa un bon maneho financiero pa pais Aruba.

Reunion cu Dutch State Treasury Agency

Den mesun cuadro di trabaonan pa mehoracion di maneho financiero di pais Aruba tambe e mandatario encarga cu finansa a haci un bishita na Dutch State Treasury Agency kende bao instruccion di BZK ta percura pa Aruba por haya e fondonan



pa cubri e fiansanan cu Aruba ta haya for di Hulanda. A bay pa sera conoci y tambe intercambia un paar di informacion cu ta tecnicamente relevante pa locual ta bira e trabaonan cu ta wordo haci ariba nivel di treasury aki na Aruba y tambe na Hulanda. Asina cada banda por tin e conocimiento y por alinia e trabaonan cu tin cu wordo haci.

Continuacion MINISTER XIOMARA MADURO A REUNI RIBA E TRABAONAN....



Reunion cu Vereniging cu Nederlandse Gemeenten

Ademas a bishita e Vereniging Nederlandse Gemeenten, VNG kende ta wordo encabesa pa e alcalde di Den Haag, Sr. Jan van Zanen. Aki a busca e sosten y e cooperacion necesario pa locual ta e mehoracion di e.o. proceso di compra di servicio y producto di gobierno di Aruba. Otro punto ta e parti di e sistematica di presupuesto y cual ta topiconan relevante pa locual ta tema A den landspakket. Si compara cu Hulanda, aki na Aruba tin un solo plano di gobernacion, pero locual tin aki nos lo por wordo compara cu gemeente di Hulanda pa locual ta e administracion financiero. VNG tin un centro di experticio y aki ta unda Aruba ta busca pa por haya asistencia pa por mehora e sistemanan di e proceso di compra di servicio y producto aki na Aruba.

Reunion cu Oscar van Leeuwen di Improven

Riba e mesun topico di tereno financiero a reuni tambe cu Sr. Oscar van Leeuwen di Improven kende hunto cu e partner local Grant Thornton tin den nan encargo e investigacion pa mehoracion di e maneho y control financiero. Esaki pa gobierno por ta mas den control di e situacion financiero di nos Pais y asina saca afo unda nos ta para y kico ta e procesonan cu tin cu cambia pa trece e mehoracion cu kier wordo logra. E mandatario a acentua cu esaki ta e reunion cu mester a tuma luga pa medio di zoom, pa motibo cu covid a haci su entrada na cas di Sr. van Leeuwen. E investigacion aki ta rekeri pa por cumpli cu tema A.1.2 di e Landspakket.

Miembro di delegacion financiero di Aruba a reuni cu ambtenaar di Coho y BZK

Tambe e mandatario a trece dilanti cu miembronan di e delegacion financiero di Aruba a reuni na nivel di ambtenaar, cu ambtenaarnan di Coho y tambe BZK, pa por a intercambia algun informacion tecnico cu ta necesario pa e bon cooperacion entre Aruba cu Hulanda pa locual ta trata e topico di Coho.

Na clausura hunto coleganan minister Tjon, Croes y tambe Minister Plenipotenciario Besaril a reuni cu Minister Rob Jetten pa desea e mandatario exito cu e reto cu tin su dilanti como minister di Clima y Energia di Hulanda. E meta tabata pa asina fomenta e bon relacion politico cu ta necesario pa bienestar di



pais Aruba.

Esaki tabata e relato di biahe pa Hulanda y e meta di e minister di Cultura pa atende e Vierlandenoverleg y tambe e reunionnan riba e tereno financiero cu esnan relevante pa e trabao cu mester wordo haci pa e implementacion di e acuerdonan cu tin pa locual ta trata e landspakket pa mehoracion financiero di pais Aruba.



A REUNI CU DIFERENTE DEPARTAMENTONAN DI HUSTICIA DEN CUADRO DI PROYECTO DI EDIFICIO EX-CODEMSA




Dialuna durante dia, Minister di Husticia y Asuntonan Social Sr. Rocco Tjon a reuni cu e diferente departamentonan di Husticia. Manera a wordo anuncia algun luna atras, e proyecto caminda diferente departamento di Husticia lo bay muda pa e edificio di Ex-Codemsa, ta den pleno ehecucion. Den cuadro di esaki, a reuni cu Cuerpo Policial, Inmigracion, Bureau City Inspector y CEA, caminda a logra determina e necesidadnan concreto cu nan tin mester di dje, pa asina nan por ubica nan trahadonan. Pues un proyecto sumamente importante pa Ministerio di Husticia.

E proyecto aki ta importante, pa motibo cu ora ubica e diferente departamentonan di husticia bou di un solo edificio, esaki lo percursa pa procesonan ta miho alinia pa trabounan por wordo miho ehecuta, tambe lo percursa pa brinda un miho servicio na henter nos comunidad. Locual tambe ta hopi importante, ta cu lo percursa pa e trahadonan tin e espacio y circunstancianan necesario pa por haci nan trabounan, locual nan tin derecho riba dje. Nan condicionnan di trabou lo ta hopi mas miho di locual nan ta actualmente.



Continuacion A REUNI CU DIFERENTE DEPARTAMENTONAN DI HUSTICIA....

Por ultimo, e Mandatario a indica di a ricibi e draft final, den cual a delinia e necesidadnan di cada departamento. Pronto lo bay entrega y presenta esaki na APFA, pa di e forma ey, mas tarda den luna di Mei, por presenta e concepto di Ley pa cu esaki den Parlamento di Aruba, pa asina e proyecto aki por wordo aproba y pa e trabounan mes por cuminsa. Di e forma aki, e trahadonan lo por traha bou di circunstancianan hopi mas miho, y lo por brinda un miho servicio na nos comunidad. Adicionalmente, e proyecto aki lo percura pa baha gastonan, cual lo resulta cu por bay haci hopi mas cu e recursonan limita cu nos tin.





MINISTER ENDY CROES PRESENTE NE DI CINCO EDICION DI GIOVANNI AREND SZ CLASSIC BODYBUILDING 2022



Despues di dos dia largo di evento, diasabra ultimo a tuma luga e gran final di e cinco edicion di Giovanni Arendsz Classic 2022 internacional organisa pa Aruba Bodybuilding & Powerlifting Association. Un Cas di Cultura bon atendi unda Minister Endy Croes tabata presente a hiba palabra y otorga premio ne ganadonan. E competencia a conta cu participacion di atletanan local y internacional.



Mas di trinta atleta a participa tanto hende homber como hende muhe di Aruba, Curaçao, Guyana, Surinam. Trinidad y Tobago, Mexico, Antigua, Haiti y Jamaica. Minister Endy Croes ta gradici sr. Giovanni Arendsz pe invitacion y recepcion. Alabes ta felicita Aruba Bodybuilding & Powerlifting Association pa un tremendo evento. Pabien na tur e ganadonan y esnan cu a participa na e gran evento y a hacie uno exitoso!

MINISTER DI DEPORTE TA FELICITA SELECCION DI ARUBA CU TA GANA EKIPO INTERNACIONAL CU SCORE DI 3-0

**Den un partido amistoso na caminda pa Nations League di
CONCACAF 2022**



Diabierna ultimo Minister Endy Croes tabata invita pa presencia e tremendo partido di futbol entre seleccion nacional di Aruba y ekipo internacional. Un Compleho Deportivo Guillermo Prospero Trinidad completamente yen di fanaticada pa sostene nos seleccion nacional den un wega amistoso contra hugadonan internacional cu ta activo riba nos isla. Fanaticada di bon futbol por a disfruta di un excelente partido unda seleccion nacional a vence y bira ganado di e partido aki cu e score di 3-0. E wega aki tabata di preparacion na caminda pe campeonato di Nations League 2022 di CONCACAF cu lo tuma luga den luna di juni proximo.

Minister Endy Croes ta felicita Arubaanse Voetbal Bond (AVB), sr. David Abdul pa e iniciativa como tambe patrocinadonan cu a haci e evento aki posibel. Aruba completo por a disfruta di un anochi ameno y agradabel di un wega di nos seleccion nacional na cas. Pabien na nos seleccion nacional!



2022 | AÑA DI
INVERSION Y
OPORTUNIDAD



E MIHO COSNAN DEN BIDA NO TA BIN FACIL.
PERO NA FINAL TA BALE PENA E SACRIFICIO.
CORDA SEMPER CU MEYMEY DI CADA DIFICULTAD,
TIN UN OPORTUNIDAD PA EXPLORA!